

FILIPAI

Polo'a kalavusifi'mo mai'nenoe'ae'mo mani avo'mo kae'niye. Kalavusifi'mo mai'nige'apae'mo mago vaye'mogi apaini hu'a ate'naya'monanafa Polo'a lusi kava huno amogaga aitenoe'ae'mo, lapamogaga aiyo, huno avo'mo kae'niye.

Filipai siosi vaye'mogi mago ofalinimo Polo'a ami'nagenoe'ae'mo lapao ke hone, huno avo'mo kae'niye.

Kalaisi'a agai'amo alino afepi ate'niya kavafe'mo, ani agufa kava'mo hiyo, huno laha pai'niye (Sapata 2). Agai'ae'mo ava gemo, nakame hiyo, huno laha pai'niye. Henaga gemo'a hunoe'ae'mo, alagepa kavafe'mo lapakesa afifi hutapa maiyo, huno hu'niye.

1 ¹ Nagaemo Polo'na'e Timoti'e'mo Yesu Kalaisi ali'ya'amo ne'alu'a vekala'mo mai'neta'a Polo'namo muki Filipai taonifi'mo mai'naya vaye'mo Kalaisi Yesupi'mo mai'naya vaye'mogitapae'mo mani avo'mo nekaove. Nagaemo muki lapaote vayafenagi konagatimogite'mo yagai'a ne'apataya vayatama vayafenagi mono ali'yate'mo mai'naya nikeni vayafenagi hu'na mani avo'mo nekaove. ² Afotimo Goti'e Ala kava netimo Yesu Kalaisi'e'mo fiku lapa mae'ana lapami'anageno lapaipamo'mo falu hino.

Polo'a nunumu'mo huno apate'niya gemae

³ Muki afina'mo lapakaefe'mo nagesamo afi'nae'mo Goti'nimofe'mo hao ke nehove. ^{4,5} Lapakaemo hogote afinateti'mo Kalaisife'mo alagepa faigoko gemo aino atagu faesiyafe'mo nagae'e'mo afalu afalugana huta lokaeta mai'nona'mofe'mo muki afina'mo nunumu'mo hu'na nelapate'nae'mo namogaga ne'auve. ⁶ Goti'a lapaipafi'mo aepa faino ali'ya'mo alime alime ne'esigeno Kalaisi Yesu'a eminesiya afina'mo ali'ya'amo alino hano hugiye, hu'na lole nagesamo o'afi'na lokiya vai'na lagi nagesamo afi'na ne'mauve. ⁷ Goti'a fiku naha maeno nami'nige'na kalavusifi'mo mai'ne'nae'mo alagepa faigoko ge'amo ha maesuvafe'mo ge hu'na ali'na lokiya vai'na ne'atove. Fiku naha maeno nami'niya kava huno fiku lapa maeno nelapamigetae'mo magoke agufa ali'ya'mo aliteta muki afina'mo magoke laipa lagesamo ali'nona'mofe'mo lapakaefe'mo alagepa hu'na nagesamo ne'afuve. ⁸ Yesu Kalaisi'a lapakaefe'mo hau'niya kava

hu'na lapakaefe'mo lusi kava huno ne'nahaiye, hu'na nehugeno'ae'mo Goti'a afiteno naha maeno'ae'mo, lama ge hiye, huno nehiye.

⁹Nunumu'mo hu'na nelapate'nae'mo, Gotiyo, apaipafi'mo ali'ya'mo alige'apao alagepa hu'a afi'ne'a alagepa hu'a ali'a fako nehu'apa mago'e hu'a hapau apayamopafi'mo hapaino. ^{10,11}Alagepa hu'a age'ne'a ali'a fako nehu'apa hogote alagepa kava'mo agete'a akame hugae. Kalaisi'a eminesiya afina'mo afole aisigeno'ae'mo o'ani'ya kava'mo apaipafi'mo ohanesigeka vai'mo o'apamigane. Alagepa kava'mo Yesu Kalaisiteti'mo apaipafi'mo havai tenageno alagamo aenage'a vaya'mogi agete'a kagikale'mo ali'a asaga hiyo, hu'na nunumu'mo hu'na nelapatove.

**Polo'a kalavusifi'mo mai'nigeno'ae'mo alagepa faigoko
gemo aino atagu faeno uneno hu'niya gema**

¹²Konaga'nimogitapae, hu'na, mani hisuva gemo afisayafe'mo nahau'niyanagi alagepa hutapa afiyo. Mani hanageke ya'mo nagaetegamo afole ai'niya'mofe'mo alagepa faigoko gemo'a mago'e huno aino atagu faeno uneno nehiye. ¹³Muki ati vayanagi hogote gamani vekale'mo yagai'a ne'ataya ati vayanagi muki manile'mo mai'naya vayanagi hu'a Kalaisi agi'alefe'mo kalavusifi'mo mai'niye, hu'a ago nage'nae. ¹⁴Kalavusifi'mo mai'noge'apae'mo asole konagatimogi ago nage'naya'mofe'mo lokiya vai'a mai'ne'apae'mo Ala kava nefe'mo mago'e hu'a apakesa afi'a fatago nehu'a koli osu'a he ti'a Goti ge'amo ae'a hakalo hu'a hapa nepaiye. ¹⁵Mago vaya'amogi apaipa kafamo nahaete'a ae'a nagasesayafe'mo Kalaisife'mo ava gemo ae'a hakalo hu'a hapa nepaige'a mago vaya'amogi alagepa apaipafati'mo ae'a hakalo hu'a hapa nepaiye. ^{16,17}Ani vayapati'mo nagaefe'mo hapau'nige'apae'mo, alagepa faigoko ge'amo ha maesiyafe'mo Goti'a alino ate'niye, hu'a nagete'a Kalaisife'mo ava gemo ae'a hakalo hu'a hapa nepaiye. Alu vaya'mogimo apaipa'afati'mo ge nosafa ala apaki'apimo alisayafeke'mo ae'a hakalo hu'a hapa nepaiye. Kalavusifi'mo mai'noge'apae'mo, mago'e huta hanageke ya'mo amigune, hu'a apakesamo ne'afiye. ¹⁸Afa'a ina agufa kava'mo hane'niye. Hosu apaipafati'mo Kalaisife'mo ava gemo ae'a hakalo hu'a hapa nepaifi lama ge apaipafati'mo Kalaisife'mo ava gemo ae'a hakalo hu'a hapa nepaisafigeno kanalene. Kalaisife'mo ava gemo ae'a hakalo hu'a hapa nepaiya'mofe'mo namogaga ne'auve. He, mago'e hu'na namogaga aiguve. ¹⁹Lapakaemo nunumu'mo hutapa ne'natayanageno Yesu Kalaisi Auneme'amo'mo naha maeteno nagufamo alino katino nategaiye, hu'na ago afi'nove. ²⁰Hosu kava'mo hute'na navagage hisiya kavafe'mo alagi no'nahaiye. Alagepa kava'mo huguve, hu'na naipamo kalite'na navayagunagu hu'na agava ne'mauve. Hogote'na Kalaisi agi'ale'mo muki afina'mo ali'na asaga hu'novanage'na falisufi afa'a maisufige'na hemeni'e'mo ani kava'mo hu'na aise'amo koli osu'na

agi'ale'mo ali'na asaga hugesuve. ²¹ Afa'a maisuvana Kalaisitefeke'mo afa'a maiguve. Falisuvana akamelegati'mo mago'e ya'nimo aliguve. ²² Ma mopafi'mo maisuvana mago'e hu'na ali'ya'mo alisugeno mago'e alagamo aegaiye. Na agufa kavafe'mo nahau'nifi hu'na o'afi'nove.

²³ Lole kava'mo'a alino navayu hulino ne'viye. Ma mopamo atale'na u'na Kalaisi'e'mo maisuva naipamo nekaliye. ²⁴ Falite'na u'na Kalaisi'e'mo maisuva kava'mo'a nagai'nilefe'mo aeno agaseno hogote alagepa kava'mo hane'niya'monanafa lapakaetefe'mo ma mopafi mai'ne'nae'mo lapa maesuva kava'mo'a ago aeno agase'niye. ²⁵ He, mago'e hutapa Kalaisife'mo lapakesa afita fatago nehutapa lapamogaga aisaya kava'mo'a ko sisiyafe'mo u'na lapakae'e'mo lokae'na maiguve, hu'na ago afi'nove. ²⁶ Halate lapakaetegamo u'na lokae'na maiguva'mofe'mo mago'e hutapa Yesu Kalaisife'mo lapamogaga aisayafe'mae.

²⁷ Lapakaemo magoke kava'mo hutapa Kalaisife'mo alagepa faigoko ge'amo akame hutetapa alagepa kava'mo hutapa maiyo. Mai'nisage'nae'mo lapakaetegamo u'na lapakesufi olapakesufige'a mago vaya'mogimo, o'atale'a magoke apaipa apakesamo alite'a Kalaisife'mo alagepa faigoko ge'alefe'mo magokepi lokae'a mai'ne'a kame nehae, hu'a lapava gemo hu'a naha paisage'na afiguve. ²⁸ Kame vayatapie'mo koli'apimo osutapa lokiya vaita maiyo. Lapakaemo ani kavateti'mo, alagi lageso hugae, hutapa alita apave lisage'a agegae. Agegaya'monanafa lapakaemo agetapae'mo, lagufamo alino katino lategaiye, hutapa agegae, Goti'a lapa maegaiya'mofe'mae. ²⁹ He, Goti'a Kalaisifeke'mo lapakesa afita fatago hisaya kava'ageke'mo fiku alino olapami'nifa agaetefe'mo lapakafu kisiya kava'e'mo alino lapami'niye. ³⁰ Kame hu'nogetapa ago nage'nae. Hemeni'e'mo kame nehugetapa nava gemo ne'afiye. Ani agufa kava'mo hutapa kame nehae.

**Kalaisi'a agai'a agi'ale'mo alino afepi ate'nigeno Goti'a
agi'ale'mo alino asaga huno ate'niya gemae**

2 ¹ Lapakaemo Kalaisipi'mo mai'nageno'ae'mo lapaipamo alino lokiya vaino nelapatefiye. Agaemo lagaefe'mo hau ayamopafi'mo hau'niye, hutapa lapakesamo ne'afigeno'ae'mo lapaipamo alino he tino nelapatefiye. Lapakaemo Goti Auneme'amo magokepi alitetapa agae'e'mo afalu afalugana huta lokaeta ne'maifiye. Magokepi yuna lapaipa kalitapa konagatapie'mo lapau lapayamopafi'mo nelapaiyiye.

² Ani kava'mo lapakaetegamo afole ai'nisiya'mo'mo magoke lapakesamo afi'netapa magoke agufa kava'mo huta lapau lapayamopafi'mo lapaino. Magokepi alagepa huta lokaeta mai'netapa magoke lapaipa lapakesamo aligeno'ao naipafi'mo namogaga aisuva kava'mo'a mago'e huno havai teno. ³ Lapakaitapieke'mo lapakesamo afitapa lapakitapile'mo alita asaga hisayafe'mo mago kava'mo afa'a alagi osiyo. Lapakufamo alita afepi

atetetapa konagatapie'mo, alagepa vayanage'a ago ae'a lagase'a mai'nae, hutapa lapakesamo afiyo. ⁴Lapamete lapamete hutapa lapakaitapi yafeke'mo lapakesamo o'afitapa muki vaya'ai ya'efe'mo lapakesamo afitapa hapa maeyo.

⁵Kalaisi Yesu'a agesamo afino mai'niya kava hutapa lapaipafi'mo lapakesamo afitapa maiyo. ⁶Agaemo Goti'a ali'niya agufa aipa agesa'amo ali'nige'ana magoke aiyaya vekala'mo mai'na'a'monanafa ani agufa kavake'mo hu'na maiguve, huno agesamo o'afino afa atale'niye. ⁷Ala agi'amo ataleno ma mopafi vekagana huno afole aiteni ala agi o'alino afa ali'ya ne'aliya vekana huno hamale'niye. ⁸Vaya'mogi, ma mopafi vekage'mo mai'niye, hu'a age'nae. Agai'a agi'ale'mo alino afepi atetenoe'mo Goti ge'amo akame huteno faligane huno hu'niya gele'efe'mo akame huteno haino hapai'niye. He, malipu yosale'mo falisiya kavate'efe'mo alagi akame hu'niye. ⁹Ani kava'mo hu'niya'mofe'mo Goti'a lusi kava huno alino asaga huno ateteni ala agi'amo aeno apakase'niya agi'amo alino ami'niye. ¹⁰Ami'niya'mofe'mo muki koku'napi vayanagi ma mopafi vayanagi ma mopamo afe'alumelaga vayanagi hu'a apale'ya fai'ne'apae'mo ¹¹Yesu Kalaisi'a Ala kava ne'mo mai'niye, hu'a afotimo Goti agi'ale'mo ali'a asaga hugae.

**Alagepa kava'mo hutetapa ha le yakana
hutapa maiyo, huno hu'niya gemae**

^{12,13}Nahau nayamopafi'mo nahau'niya vaya'mogitapae, hu'na, Goti'a agai'amo hau'nigeno'ae'mo huguve, huno lapaipafi'mo ali'ya'mo ne'aligetapae'mo alagepa kavafe'mo lapaipamo kali'netapa hisayafe'mo ali'ya ne'aliya'mofe'mo lapakae'e'mo ina ali'ya aliyo. Koli hutapa atete nehutapae'mo lapakaitapi lapakufamo alita katita lapatetapa alitapa hano hiyo. Lapakae'e'mo magokepi lokae'na mai'nova afinateti'mo muki afina'mo alagepa huta afi'naya agufa kava'mo hutapa o'mai'nova afina'e'mo ani kava hutapa mago'e huta afiyo. ¹⁴Muki kava'mo nehutapae'mo hosu lapaugosamo kali'netapa hagalu hagalu hutapa ge o'vaiyo, ^{15,16}vai'mo olapamisageno lapaipafi'mo hosu kavatapimo ohane'nisiya'mo'mo Goti mafa'ne'amo maigae. Lapakaemo hosu kava'mo nehaya vaya'e hosu apaipa apakesamo ne'afiya vaya'mo mai'naya folagapi'mo ne'maiya'mofe'mo lama gege'mo afa'a maisaya ya'mo alino ne'apamiya gele'mo atafautapa alagi hu'netapa ha le yakana hutapa mai'netapae'mo ha le ya'mo alita apamiyo. Lapakaemo ani kava'mo hu'nisayana Kalaisi afina'mo afole aisinge'nae'mo, nayamufa ali'ya'mo ali'na atale'nove, hu'na osugufa namogaga aiguve. ¹⁷Lapakesa afita fatago hu'netapae'mo alagepa kava'mo nehaya kava'mo'a lapakaemo Goti'mo ofalini ne'amiya yakana huno hane'niye. Namagisage'na nefali'nae'mo kola'nimo ali'na lapakae ofalinile'mo laki malesuvana namogaga

aite'na lapakae'e'mo magokepi lamogaga aigune. ¹⁸Ani kava'mo afole aisigetapae'mo lapamogaga aitetapa nagae'e'mo magokepi lamogaga aigetao.

Timotife'mo ava gemo hu'niya gemae

¹⁹Ala kava ne'mo Yesu'a hau'nisigeno'ae'mo aise afina'mo utesige'na Timoti'mo ali'na atesugeno lapakaetegamo uno lapaketen'o'ae'mo eno lapava gemo huno naha paisige'na afite'nae'mo naipamo'mo falu hugiye. ²⁰Nagae'e'mo lokae'a ali'ya ne'aliya vayapati'mo mago vekamo'a Timotikana huno o'mai'niye. Agai'age'mo alagepa hutapa maisayafe'mo aipa kaliteno alagi nehaye. ²¹Muki vaya'mogi Kalaisi Yesu ali'yafe'mo apakesamo o'afi'a apakai'api ali'yafeke'mo apakesamo ne'afiye. ²²Nehaya'monanafa Goti'a Timoti'mo amalageka hau'nigeno alagepa ne'mo afole ai'nigetapae'mo lapakaemo ago age'nae. Mafa'ne'apimogi afo'apimogi'e'mo lokae'a ali'ya'mo ne'aliya agufa kava huta'a Timoti'e nagae'e'mo alagepa faigoko gelefe'mo magokepi lokaeta'a ali'ya'mo ali'no'ae. ²³Haiya kava hu'na maisufige'na agete'nae'mo nahau'nisiya'mo'mo ali'na atesugeno lapakaetegamo ugiye. ²⁴Ala kava ne'mo'a hau'nisiya'mo'mo aise afina'mo utesige'na nagai'nimo lapakaetegamo visuvafe'mo nagesamo afi'na agava ne'mauve.

Epafalonaitasife'mo ava gemo hu'niya gemae

^{25,26}Lapakaemo konagatimo Epafalonaitasi'a naha maesiyafe'mo alita ate'nageno nagaetegamo e'niye. Konaga'nimo'a e'nigeta'a nagae'e'mo magokepi lokaeta'a mai'neta'a ali'ya'mo alige kame huge huta'a ne'mau'ae. Visiyafe'mo o'nahau'niya'monanafa uno lapakaemo lapakesiyafe'mo lusi kava huno agesamo ne'afiya'mofe'mo ali'na atesugeno lapakaetegamo ugiye. Lapakaemo kaita'mo hau'niye, hu'a hu'naya gemo afi'naya'mofe'mo aipamo'mo kana nehaye. ²⁷He, ago falisiya agufa kaita'mo hau'niya'monanafa Goti'a hau huno ate'niye. Agaefeke'mo hau huno o'ate'nifa nagae'e'mo mago'e kanamo o'alisuvafe'mo hau huno nate'niye. ²⁸Kaita'mo hau'niya'mofe'mo agetetapae'mo lapamogaga aisageno'ae'mo naipamo'mo falu hisiyafe'mo nahau'niyanage'na ali'na atesugeno lapakaetegamo ugiye. ^{29,30}Agetetapae'mo, konagatimogamo mai'nane, hutetapa lapamogaga ne'aitapa alita falu fala hutapa ateyo. Lapakaemo afagitega mai'naya'mofe'mo afa'a eta naha o'maegaya'mofe'mo u'na ha maegaue, huno huteno nagaetegamo e'niye. Falisiya kavafe'mo koli osuno Kalaisi ali'ya'aleti'mo falisiya kava'mo hu'niya'mofe'mo agi'ale'mo alita asaga huteta ani agufa vaya'ai apaki'apile'e'mo alita asaga hiyo.

3 ¹Konaga'nimogitapae, hu'na, ge'nimo hu'na hano hugefe'mo huvanagi henaga ge'nimo afiyo. Ala kava nefe'mo lapamogaga aiyo.

Lapa pai'nova gemo halate lapa paisuvafe'mo alaga o'nahae'niyanage'na lapa maesuetapa alagepa hutapa maisayafe'mo lapa nepauve. ²Mago vaya'mogimo afela kalagana hu'a mai'ne'a hosu ali'ya'mo ne'ali'a hosu kava'mo hu'a apakufamo lagau'a ne'apataya vaya'aife'mo ehetafiye. ³Lagaemo alagepa kavatileti'mo laha maegaiye, huta osuta Auneme'aleti'mo Gotifeke'mo mono huta Kalaisi Yesufefe'mo lamogaga aita amuse nehune. ⁴Alagepa kavatileti'mo afa'a laha mae'niyesinana alagepa kava'nileti'mo henaga'amo alagepa hu'na mauvesine. Mago vaya'mogi alagepa kavatileti'mo laha maegaiye, hu'a apakesamo afi'nisayana ae'na apakase'nova'mofe'mo alagepa kava'nileti'mo naha maegaiye, hu'na nagesamo afuvesine. ⁵Naha maegaiye, hu'na nagesamo afuvesina agufa kava'mo hane'niyana ita'nimo'mo alino nate'nigeno magoke salemo utege'apae'mo nagufamo lagau'a nate'nae. Nagaemo Isaleli vekamo mai'ne'na Menisameni nofi vayapati vekamo mai'nove. Muki naginago vaya'mo Himulu vaya'age'mo mai'nae. Hogote'na Falasi mono vekamo mai'ne'na Yu vaya'ai ke'aepa gemo akame hu'nove. ⁶Nagaemo, Goti ali'ya'amo aligesuve, hu'na hute'na lusi kava hu'na nayamukiki hu'na siosi vaya'aitegamo kame hu'na apate'nove. Ke'aepa gemo alagepa hu'na akame hu'noge'a nagete'apae'mo vai'mo o'nami'nae. ⁷Hogote'na ani agufa kava'mo hu'na mai'ne'nae'mo, naha maegaiye, hu'na nagesamo afite'na amuse hu'nova'monanafa Kalaisi'a atafausuvafe'mo, naha o'maeno natafauno nategaiye, hu'na nagesamo afi'ne'na atale'nove. ⁸Atale'novanage'na hemenimo hu'nae'mo, hogote ya'mo aeno agase'niya ya'mo Ala kava ne'nimo Kalaisi Yesu'a alagi age'na aeto hisuvafeke'mo kanamo ali'ne'nae'mo muki ya'mo ago atale'nove. Hosu'niya ne'ya'mo alini u'a ne'atalaya ne'yakana huno hane'niye, hu'na hute'na Kalaisi'a alisuvafe'mo ali'na yaga au'na atale'nove. ⁹Nagaemo ke'aepa gemo akame hute'na nagai'ni fatago kava'nimo ali'novanageno Goti'a nagesiyafe'mo o'nahau'niye. Kalaisifeke'mo nagesa afi'na fatago hu'nogeno Goti'a fatago kava'amo fiku alino nami'nige'na ali'novanageno Goti'a Kalaisipi'mo nageteno'ae'mo, naulagale'mo fatago vekamo mai'nane, huno hisiyafeke'mo nahau'niye. ¹⁰Kalaisi'a age'na aeto hisuvafeke'mo ne'nahaiye. Fali'niyateti'mo he ti'niya himamu'amo'a naipafi'mo ali'ya'mo alisige'na agegesuve. Kanamo ali'niya kavatefe'mo magoke agufa kava hu'na kanamo alisuvafe'mo ne'nahaiye. Fali'niyanage'na atafa naipamo hano hisiyafe'mo falite'na agaekana hu'na maigesuve. ¹¹Atupale'mo u'na ava'yi hute'na muki fali'naya vayapati'mo alagepa hu'na he tisuvafe'mo amalageka hu'na nayamukiki nehuve.

**Polo'a atupale'mo uno ava'yi hisiyafe'mo
nagu nagu huno u'niya gemae.**

¹²Atupale'mo u'na ava'yi osu'nove. Hai'na ohapai'novanage'na atafausuvafe'mo vegala ae'na nagu nagu hu'na u'na atafausuvafe'mo Kalaisi Yesu'a hogoteno natafau'niye. ¹³Konaga'nimogitapae, hu'na,

atafau'nove, hu'na nagesamo o'afi'na magoke kavafe'mo hu'nae'mo nakamelaga eno ne'viya kava'mo nage kani'na atalete'na naulagati'mo ne'aya kava'mo alisuvafe'mo fai'na alipaili'na nagu nagu hu'na ne'uve. ¹⁴Goti'a anaga kotegamo hai'na maisuvafe'mo Kalaisi Yesuteti'mo nagaefe'mo keya ae'nige'na atupale'mo u'na ava'yi hute'na hetama'nimo alisuvafe'mo nayamukiki hu'na nagu nagu hu'na ne'uve. ¹⁵Ne'uva'mofe'mo alopaya'vaya'mo haita hapai'nona vaya'mogitamo ani kava huta maigetao. Mago vaya'amogitapa alu lapakesamo ne'afisaya'mo'mo Goti'a mani kava'mo afa'a alino lapave ligiye. ¹⁶Alino apave ligiya'monanafa alino lave li'niya kava'mo akame huteta magoke laipa lagesamo aliteta magoke gemo akame higetao.

¹⁷Konaga'nimogitapae, nehuva kava'mo nagetetapa ani kava'mo hutapa nakame hiyo. Ani kava'mo huta ne'mauna vaya'mo alagepa hutapa lagetetapa lakame hiyo. ¹⁸Mani hemenimo hisuva gemo muki afina'mo lapa pai'novanage'na hemenimo halate mago'e hu'na lapa pai'nae'mo, Asole vaya'mo Kalaisi kame vaya'amo mai'ne'a malipu yosale'mo fali'niya kavafe'mo ava gemo ae'a ati nekae, hu'na hute'na naunumo nelamige'na lapa nepauve. ¹⁹Goti'a alino apago'ya lagauno apatalesige'a lagi lageso hugae. Apakaemo ne'yafeke'mo lusi kava hu'a apakesamo ne'afiya ya'mo goti'apimo'ae. Apavagage hisiya yafeke'mo amuse hu'a ne'atae. Ma mopafi yatefeke'mo apaipa apakesamo ali'a atalageno ne'viya'monanafa ²⁰lagaemo koku'napi vaya'mo mai'neta koku'napati'mo eminesiya vekamo'a lagufamo alino katino nelateya vekamo Ala kava ne'mo Yesu Kalaisifeke'mo lavayagunagu huta agava ne'maune. ²¹Agaemo ayamufa'aleti'mo muki ya'e vaya'e'mo alino aiyafi'mo apateteno yagaino apatesiya ayamufa'aleti'mo hosu lagufamo lokiya o'vaino nekasaliya lagufamo agai'a agufagana agufa lagufamo ha le konali lagufamo alino hamaleno lategaiye.

Ani kava'mo hiyo, huno hu'niya gemae

4 ¹Nahau nayamopafi'mo nahau'niya konaga'nimogitapae, lapakaefe'mo lusi kava huno ne'nahaiye. Lapakaefe'mo namogaga ne'auvanageno Goti'a lapakaeteti'mo ala nagi'nimo namigiye. Inagi Ala kava nepi'mo lokiya vaitapa he tita maiyo.

²Yuvotiga'e Sitakiga'efe'mo lanahao ke nehovanagi, lanakaemo Ala kava nepi'mo mai'netanae'mo magoke lanaipa lanakesamo alitana mai'ao. ³Goti ali'ya'amo nagae'e'mo magokepi lokaeka ne'alina ve'nimogae, Kagaefe'mo kahao ke nehovanagi, ani lole atala'mo nagae'e'mo alagepa faigoko gelefe'mo magokepi lokae'ana ali'ya'mo ali'na'a atala'mo alagepa huka hana mao. Anakaegi Kilemeni'agi muki vaya'mo nagae'e'mo magokepi lokaeta ali'ya'mo ne'aluna vayanagi apaki'apimo Goti'a maige maige hu'a maisaya vaya'ai apaki'apimo avo'mo kae male'niya

mukufi'mo avo'mo kae male'niye. ⁴Ala kava nefe'mo muki afina'mo lapamogaga aiyo. Halate, lapamogaga aiyo, hu'na nehuve. ⁵Yuna lapaipa kava'mo alitapa apave lige'apao lapakeyo, Ala kava ne'mo ago eminesiya afina'mo alagi hogo nehianagi. ^{6,7}Mago kavafe'mo lapausoli osuta muki kavatefe'mo nunumu hutapa afi neketapae'mo hao ke nehetapa lapau'nisiya yafe'mo Gotife'mo ge huta afi gegeno'ao lapaipamo alino falu huno lapategaiye. Haiya kava huno laipamo alino falu huno nelatefi o'age'nona'monanafa afa'a alino falu huno lapatesiya kava'mo'a Kalaisi Yesupi'mo mai'nayanageno lapaipa lapakesale'mo afa'a yagaino lapategaiye.

⁸Konaga'nimogitapae, ge'nimo hu'na hano hugefe'mo hu'nae'mo, lapakaemo muki alagepa kava'e ala apaki'apimo ne'apamiya kava'efe'mo lapakesa afifi hutapa maiyo. Lama ge kavanagi ani kavatefe'mo agi'ale'mo ali'a asaga hu'a ne'ataya kavanagi fatago kavanagi o'ani'ya ya'mo ohane'niya kavanagi kanale kavanagi ala agi'amo hane'niya kavanagi hutapa lapakesa afifi hutapa maiyo. ⁹Nagaemo ali'na lapaya male'nogetapa alita lapaipafi'mo male'naya gemo akame hiyo. Nava gemo afiteta nehuva kava'mo ago nage'nayanagi nakame higeno'ao Goti'a laipamo alino falu nehiya kava'mo aepa vekamo'a lapakae'e'mo magokepi lokaeno maino.

**Polo'a fiku ha mae'a ami'naya ya'mo
alitenoe'ae'mo hapao ke he'niya gemae**

¹⁰Yatala afina'mo utegetapa halate nagaefe'mo lusi kava hutapa lapakesamo ne'afitapa mago ya'mo fiku naha maeta nami'nage'nae'mo Ala kava nepi'mo lusi kava hu'na namogaga ai'nove. Muki afina'mo nagaefe'mo lapakesamo ne'afiya'monanafa alita nave lisaya ka'mo ohane'niye. ¹¹Mago yafe'mo kafu hu'ne'nae'mo mani gemo nehufiye. Ha'ao, Kalaisi'a alino naya male'nige'na haiya kava hu'na ne'maufige'na vaya'mogi naha maesayafe'mo nagesamo o'afi'na afa'a mai'nove. ¹²Kafu hu afina'e mago'e ya'mo ne'aluva afina'e'mo afa'a maisuvafe'mo afite'na age'nove. Muki afina'mo u'ne'na hu'na ne'mauvategamo alu kava alu kava'mo afole ne'aige'nae'mo afa'a mai'nove. Alino naya male'nige'nae'mo naga netefi namu nepaefi kafu nehufi alop ya'mo ali'nofi hu'na afa'a maisuvafe'mo ago afite'na age'nove. ¹³Nagaemo Kalaisipi'mo mai'ne'nae'mo lokiya vaino ne'nateya himamu'aleti'mo muki kava'amo afa'a huguve. ¹⁴Ani gemo nehuva'monanafa kanamo ne'aluva kavatefe'mo alagepa kava hutapa nagae'e'mo afalu afalugana hutapa naha mae'nae. ¹⁵Filipai vaya'mogitapamo ago afi'nayana nagaemo hogote afina'mo alagepa faigoko gemo ae'na hakalo hu'na lapa paite'na Masetoniya kotegamo atale'na u'noge'apae'mo muki siosi'ale siosi'ale'mo mai'naya vaya'mogimo namite'a alisayafe'mo nagae'e'mo afalu afalugana

hu'a lokae'a ali'ya'mo o'ali'nagetapa lapakaeke'mo naga'e'mo magokepi lokaeta ali'ya'mo ali'nae. ¹⁶Lapatale'na u'na Tesalonaika taonifi'mo mai'nogetapae'mo mago'e ya'mo muki afina'ae afina'ae'mo naha maetapa nami'nae. ¹⁷Nagaemo mago ya'mo fiku alisuvafe'mo nagesamo no'afufa lapakaeke'mo akamelegati mago'e ya'mo alisayafeke'mo nagesamo ne'afuve. ¹⁸Inagi muki nami'naya ya'mo ali'nogeno mago'e ya'nimo afa'a hane'niye. Epafalonaitasi'a fiku nami'naya ya'mo alinineno nami'nige'na hai'mo ali'nove. Alagepa atumo ne'aiya ofalinimo hane'nigeno Goti'a hau'nigeno amuse huno nelapate. ¹⁹Goti'nimo'a Kalaisi Yesuteti'mo asole ya'mo male'niya yapati'mo lapakaemo muki kafu hu'nisaya ya'mo afa alino lapamigiye. ²⁰Afotimo Goti agi'ale'mo muki afina'ae afina'ae'mo alita asaga hulita vigetao. He, lama ge.

Ge'nimo alagi hano hu'niya gemae

²¹Lapakaemo muki vaya'mo Kalaisi Yesupi'mo apaote vaya'aife'mo ge apamamaeyo. Naga'e'mo lokae'a mai'naya konagatimogi'e'mo ge lapamamae'nae. ²²Muki apaote vaya'mogi ge lapamamae'naya'monanafa hogote gamani vekamo ali'ya'amo ne'aliya vaya'mogi'e'mo mago'e hu'a ge lapamamae'nae. ²³Ala kava netimo Yesu Kalaisi'a muki'amogitapamo fiku lapa maeno lapamino. He, lama ge.